

玉山草堂續集
紅蕙山房吟藁



玉山草堂續集

錢林撰

中華書局

叢書集成初編

玉山草堂續集（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一
統一書號：一七〇一八·一五一

玉山草堂續集

此據粵雅堂叢書
本排印初編各叢
書僅有此本

玉山草堂續集第一

仁和錢林東生撰

尊酒論文小草丙子

將赴粵東述懷三首

七年躬苦願，負疚忝食祿。皇華一以廢，靡及仍三復。當厲王陽志，願刮吳蒙目。庶幾可酬知，毋曰徒懷慙。朝戒嚴城裝，暮投固節宿。首塗僕御飭，久客津郵熟。去樹循舊蹊，迴山豁新目。威夷驚絕軻，浩蕩思催軸。疾動炎乃侵，心煎時易倏。幸茲得良友，眷眷余膺服。同奉使者吳同年信申。亟亟出門去，欲去復躊躇。借問何爲爾，日與古人疎。耳目近所接，總難頗有餘。苦無孝先筭，兼廢兒寬鋤。業荒口可籍，職曠咎何如。賢哉子墨子，適衛能載書。

卽景

邇邇鄉始覓，蒼蒼天欲暮。烟消月出時，遠見房山樹。

經兗州口念二韻

浮雲南下卽荆徐，一片寒山倒影虛。魯殿秦碑復何在，暮天臨眺轉躊躇。

晚次新嘉驛，寄詩社同年林三兄培厚、沈大兄岐、董大兄國華、羅大兄家彥、費三兄內章、史二兄評、王大兄道行。

撰酌都門外。遵塗汶水東。跡漂寧似梗。心擾只如蓬。宿莽披輕晦。疎棠獻小紅。相期論五際。歲晚與君同。

鄒縣拜孟子廟作

偶然爲客卿。坎壈惜生平。蠹簡七篇在。溪毛一獻成。填牆舊碑碎。甃石凍泉清。千祀檐前楸。寒山翠共撐。

見槐花戲贈吳同年

夢回亭吏催排馬。薛北滕南官路斜。還似昔年忙夏課。瀟瀟疎雨落槐花。

徐州懷古

韓生下說遭烹死。欲渡江東願已違。明日沛中兒拍手。漢家亭長繡衣歸。場平如削曉分曹。杖奮毬驚僕射勞。說與兜鍪渾不解。七軍新已募銀刀。節逢白露征衣膩。人過黃樓別酒醒。問取他年各名士。數聲風笛起漁汀。

雨後行舒城道中

空山雨忽止。悠悠發清想。時有涼風來。復聞田水響。

早發黃梅縣經濯港望破額山寫懷寄羅同年

納騎曉修阻。露零方未已。遙望破額山。明滅微雲是。我欲拾香草。遠遺瀟湘芷。愁思寫春波。空烟碧千里。

九江城下有懷陶令

偶闕三徑資。絃歌聊可爾。束帶見郡掾。棄之如脫屣。遂懷沮溺心。不薄樊須鄙。翼翼望歸鳥。依依樹城里。我來經柴桑。欲扣曠達旨。浩然懷古意。雲與江上水。

望東林作

一瓢小隱支公座。五字閑題謝客詩。寂寂斷橋流水外。虎溪惆悵獨尋時。

東林寺貽珉公

秋氣常在水。雷聲多傍山。老僧贈扶老。請與步林閒。一笑復相謝。此身猶未閒。

三笑堂

松風行有聲。缺月斜未墮。偶隨溪水去。復此磐石坐。誰許作周旋。空山我與我。

西林

營營終日將何務。解帶看山偶成趣。茅齋斜倚兩三松。花港分流六七步。西林道場誰所開。我將會客招宗雷。惠好儻蒙三益至。許分閑澹置茶杯。

晚度虎溪橋

谷靜水潺潺。翠微方掩關。露生竹林早。月與溪僧還。有愧周從事。重來問北山。

瑞州試院東軒蘇文定監稅筠州時居此題壁一首乞吳同年和之

筠州監稅非我意。東軒長老情庶幾。烏皮偶借碧梧隱。鶴骨不如支子肥。有情桑下得常住。無事漢陰容息機。樵櫟觸熱者誰子。走馬又逐黃埃飛。

高安雨景

遠山重疊亂溪流。作得荒寒不是秋。斜亞竹枝紅繖重。勃姑聲裏到筠州。

峽江城下雨中待渡有感

楓垂綠葉染秋烟。水調輕彈一兩弦。萬里客情容易起。有風有雨峽江邊。

凌江旅夜

入夢初疑雨。灘聲月一樓。蕭蕭沙上雁。并與作鄉愁。

凌江曲

酒含微綠浸春夜。人醉欲眠花滿窗。款乃一聲催夢去。暗隨烟月下凌江。

修仁

不善身不入。吾師仲氏子。未敢敵貪泉。且飲修仁水。

平圃有張文獻故宅以詩弔之

唐朝黃閣老。遺宅碧山隅。此日枿櫨盡。當年風度殊。無心猜海燕。有識辨胡雛。更歎陽春曲。千秋謫易孤。

晚泊乳源江口

舟與暝色去。不知江路寬。傍蓮秋鷺靜。入竹夜漁寒。擁絮聊忘睡。敲茶欲代餐。窗前有官燭。借作望舒看。

峽山寺貽曠元上人

丙寅歲從陳學士入粵。到峽山寺。作五言一首。寫付曠元上人。不復記矣。今年奉使過此寺。上人出以相示。紙墨粲然。爲恍然久之。因更作一首貽上人。嘉慶二十一年丙子七月二十四日。

巖舟巖磴下。乘興叩禪關。泥滓十年客。雲松六祖山。蘿銜紺蕊密。榕架綠陰閑。頭白南華侶。清言幸再攀。

題峽山寺西閣

寺小通幽處。前遊屐未經。橫斜松網結。隱見藥苗靈。猿洞春祈雨。犀潭夜汲星。從來憐佚意。失利破飄瓶。

三水縣

三日留君住。江深路莫貪。蠻音徐聽曉。海味乍嘗甘。昏旦景常變。冬春候各參。遙聞采蓮唱。的未減江南。

舟中誦黃大令任西湖雜詩和之

水仙祠外雨連汀。慶忌塔前風皺萍。一唱同心魂欲斷。烟波無際是西泠。暫到杭州望汴京。樊樓槃桮不勝情。金錢賜與君王笑。宜喚湖頭宋嫂羹。金堆栲栳買春難。萬樹宮花著意看。重到玉津園外路。酒旗風影作春寒。二月水平葦吐絲。采茶穀雨正相宜。可憐老鐵顏唐意。只解逢場唱竹枝。

詠佛山鎮風土

爲喜珍華有。兼稱耍鬧堪。酒材題若下。蔗種乞扶南。花埭春籠鶴。燈窗曉簇鴛。朝官解詢此。便作帳中談。

貝多水

氛雜雖爲累。林亭趣自賒。歌樓綠珠里。卜肆仲翔家。竹瘦蟲書字。蕉肥鹿喫花。韶春足相賞。未用惜年華。

野眺偶成

此中常有營。擾擾世閒名。忽踐邱園諾。偏增綺角情。坡晴牛送笛。崦曲鳥催耕。轉愧南村友。新居卜未成。

入謝氏園偶題

避喧攜研几。適意訪山池。自看楊家竹。非耽謝傅棋。蟬吟花氣午。人靜柳陰移。向晚行吟去。漁舟載月隨。

再遊謝氏園。有懷張秀才增。

晚從蒙密處。負杖更潛行。薜蘿皆成篆。葩攢不辨名。月斜倚巖桂。風響落山櫻。時復傷孤獨。申言眷友生。

山居樂

青山常在屋裏。溪水直到門前。乘月每逢客至。看雲未礙人眠。郊居沈約初賦。隱舍周顒已成。蓼紫芹青午食。雨香烟暖春耕。園圃偶因自闢。酪鹽無待外求。何用良田廣宅。偏宜稚結蓬頭。學道每緣疾損。著書不愛人知。松子新秋滿地。豆花疎雨一籬。

水村樂

耽吟酒詠茶詠。恣往南垞北垞。雨細好籠箬笠。溪深忽見桃花。閭巷溶溶秋水。菰蘆隱隱炊烟。飯香紅稻徐熟。日午晴軒自眠。從容世務先理。幽細人情自看。奴婢探支鶴料。兒童學作魚官。下置紫菱山畔。鳴榔青草湖頭。偶然騎馬人至。笑問得魚賣不。

鎖院詠月

西南玉鉤挂。江城涼意生。未圓偏作態。欲側故含情。滿院梧竹靜。千家砧杵鳴。清輝儘足攬。我欲貢瑤京。

五先生詩

茂才長洲沈先生巖

讀易不慕榮。著詩常自勵。襄陽舊門戶。清德今誰繼。回瞻受經時。潛焉屢出涕。

武威令錢塘沈先生宸

教織種木棉。邊地民安作。怛然頓殞謝。骨返魂應住。夙聞桐鄉間。嘗有朱邑墓。

吏部郎中錢塘張先生培

酒故美於官。嗜之以醫俗。名將輕畫餅。趣亦參金粟。何以品題之。任情稱止足。

太平守仁和葉先生藩

偶然逢俗人。閉目成結習。加冠不嫌小。垂帶何爲急。此日過檀橋。風流猶可挹。

江西新城令仁和王先生庚期

結字不敢草。呼人常以位。儒緩時易乖。何乃求爲吏。茫茫山岳內。斯人竟淪棄。

董中丞贈杏酪一器

細寫瓊糜滑。輕調石髓流。雞蘇新煮喫。中與作奴不。

張二兄衍基。蔡二兄學元。蘇二兄獻琛。三同年。招同吳同年。遊北山道院。坐李尊師西齋。詠松下風。異此一心內。積茲千寸埃。故人邀我坐。清意忽悠哉。嚶嚶烟辭竹。蕭蕭露墜苔。祛塵簾小障。戒節練新裁。瑤軫暫已息。道書猶未開。南軒落日靜。樵唱爲君來。

書院十五夜。與次軒家兄翫月。寄湖南謝學使階樹。

非烟亦非水。滿院自成秋。庭葉脫未已。笛聲無那愁。美人感幽獨。遙夜倚西樓。願以襟情詠。貽君杜若洲。

十六夜後與次軒家兄翫月寄重慶林太守培厚。

好爲語明月。莫窺樓上頭。畏教侵客夢。不得到渝州。

階下水蕉初展葉。偶以爲詠。

翠倚秋蘭嫩。壓莎蜻蜒翅。薄染湘波采。珠人遠無尋處。借得衣香爾許多。

與從子少軒海幢寺西禪堂晏坐。

樹陰掃還合。涼蟬時一鳴。欲乞臺郎几。暫憩法王城。談柄有妙理。養和多善情。晚來鉢帽至。相與證無生。

次軒家兄邀遊六榕寺訪寂上人。

折松以爲塵。日午言未罷。齋廚起微烟。落葉蕭蕭下。

題陳處士獨漉堂集後

獨演風騷瘴海瀕。此才端合配靈均。欲成變徵思逾澹。爲瀟瀟波格轉新。零落雁蟬天寶曲。荒唐姓氏義熙民。杜鵑含血悲吟夜。濤落厓山倍愴神。

和張秀才厓山詠古

東望厓門氣寂寥。長年石朽恨難消。舟中建蹕殘疆盡。海上提軍故闕遙。萬里園陵龍島月。三更鼓角螭灘潮。同心尚有文丞相。泣賦零丁是大招。

蔣制府尙書贈友石齋帖

戲鴻秋碧人爭覩。滋蕙繼之何足數。近傳快雪徵失真。聚木此年登祕府。尙書有贈我愛藏。寶珠在腕玉盈箱。合應一片羊公石。勝得千金陸賈裝。

買得領字從山本蘭亭

右軍麻紙不得見。并失唐賢舊黃絹。一僧旁注領從山。快然自足旁有小僧字。二百餘字開生面。心疑爲影爲雙鉤。墨氣晶瑩千萬秋。安得滄江逢米老。看碑爲辨遼鄉侯。

酬張孝廉維屏

梅幸折來傷遠寄。柳堪攀處惜初分。相逢正說相思苦。紅豆花開又別君。

別廣州二首

出門意惘惘。將歸無奈何。人心似楊柳。最苦別離多。曾作珠江客。重來倍有情。含愁避江草。莫使喚愁生。

別英德劉明府

相勸須傾琥珀鍾。人生難得是相逢。酒醒忽下瀘陽去。一夜灘聲樹萬重。

江行雜詠

螺金蟹飴脆。鏤玉蝦生白。味俊君不嘗。將爲僮楚客。牢落故人壺。峽山重到時。夢中還說夢。輸與老僧知。一入曹溪路。翛然染著清。晴窗小三昧。爲試綠昌明。

欲問南華寺。秋江漾淨邊。色身知不染。此地是蘭泉。
極目長天外。滄波不盡流。八行想情舊。何處滯銀鉤。

凌江館夜夢林三兄太守寄書說杭州事。覺後成此。覓便使寄重慶。

二月西湖春可憐。詩情酒分此時偏。相招茗塢探香入。有約梧窗聽雨眠。悄悄水天尋舊事。匆匆絲竹感中年。芙蓉江路秋衾夜。寫恨難通十色牋。

夜行南雄道中

夜寒星出四五箇。千家萬家掩扉臥。溫公壘敗鷓鴣叫。回盤古冢黑蛇穿破。蒼黃未許墨黔突。拘窘有如弼升座。思得沃面解征衣。強欲作詩今懶作。

庚嶺梅樹北枝未開

庚嶺梅數樹。偏客一枝春。韓袍定重到。風月倍償人。

過太和縣。吳同年枉以新什見示。奉答。

風土雖殊異。聊堪散鬱陶。溪苗茁連母。山鳥喚功曹。蓮墜風擎顫。松清露養醪。盡將佳句取。貽翰佩同袍。
贈吉安胡明府

美君能治縣。西候見君初。心每諧山水。恩常慰里閭。慕陶惟種秫。效褚欲安蔬。卻損秋時俸。囊添一部書。
吉安城下聞榜人唱竹枝歌

下水舟去疾。上水舟來遲。水車兩岸吟不已。更向江亭唱竹枝。竹枝啁啾止還作。驪兒趁巧相銜著。不知

鋤地不采山。安穩風波遠行樂。一聲高。一聲低。一聲逐走馬。一聲韻鷓鴣。枝上雛失羣。府中烏夜啼。如悲飲牛威。似感烹雌奚。清商失傳李郎子。長嘯記得商陵妻。西州大賈攬衣起。霽上漁翁側耳迷。吉州城頭人搥鼓。白沙沙平數枝鵲。斜指銅江驛外烟。亂捎玉峽洲邊雨。當年曾買釣魚篷。楚水吳灣有夢通。乞聽猿鳴休乞郡。轉船明日又巴東。

通遠驛夜偶成

晚來窗不掩。遠近入寒山。涼葉落旋止。流雲往復還。正防聲變楚。亦笑語成蠻。斟酌傷秋句。吟成且合刪。

匡廬積雪皎素映帶絕可翫賞

綠苔徑裊裊。白石溪粼粼。明月空山閒。獨步逢美人。瑤臺數千片。吹落瑤臺新。窈窕梅花時。烟霞相與春。紛吾未事擾。幾載成淄磷。一望幽虛天。萬想入無垠。曠濶滅沒際。豁然見其真。明日升東峯。思跨黃麒麟。入野寺不逢一僧。

何處攜瓢笠。梅飄雪一村。天寒不歸去。留鶴守柴門。

贈九江朱太守同年啓

都門一相送。判已隔河關。三歲分襟後。重逢秉燭閒。塵泥話滄海。客鬢惜秋山。更指庭中樹。明朝寄遠攀。

詠庾樓下晉時槐樹呈太守朱五兄

萋萋復芊芊。生根典午年。叢駢學枯楨。閱歷見蒼堅。黑飽新春雨。青蒸上古烟。皮粗苔厚積。腹洞火潛然。眞辛心調護。洪濤氣接連。終看神物化。未合老江邊。

朱太守置酒九江亭上對雪作

向曉新箋集，留歡舊雨陪。行廚珍屢薦，步障暖須開。勻點瓊枝失，柔鋪玉蘚猜。家家歌吹動，溢口又春回。

別朱太守同年寫詩奉寄附呈二韻

梅洲遠水翠篙通，溢港回看漸隔中。短小詩篇憑急寄，貪君寫入畫屏風。

孔壠驛夜不寐歎衰

倦時求伏枕，詎有一時曾。涼換風牀笛，秋生水閣燈。力衰詩強振，髭益鏡先憎。爲語江都相，時清百不能。

將次黃梅驛遇微雨作

村外林空數火明，渡頭舟小一囊輕。爲添冲澹詩人思，遠水平蕪故蔡城。

呂亭驛曉景

蒼蒼望宮雉，馳暉方渺然。林栖隱見月，崖遞去來烟。

曉次臨淮舊館

無限淮西路，吟詩此再經。倦增湖雨白，夢斷楚山青。查擁迷沙岸，棠枯記驛亭。前驅知我意，未肯急揚鈴。

發徐州後次柳泉口述寄王太守澤二首

杜發狂言好，樊稱直筆堪。能詩且須去，依例守江南。牋粗詩苦劣，遠答捐勤意。有愧范零陵，絨情一封淚。

界河夜成二十字問兗州宋太守疾

臥將□謝眺。諾每盡宗資。獨背殘燈坐。詢君不恙時。

歲將暮矣。行役永久。寂寥寡歡。意有所懷。以五言系之。

頗資升斗給。非闕簿書才。試吏除爲眞。翻然歸去來。世無荷蕢者。誰識有心哉。諸進士嘉榮。試吏江南。補縣令。未一月乞罷歸。

給札陳萬言。胸中溟渤勢。毋以決塞後。而忘便宜計。輕之爲詞人。嗟爾不經濟。陳大令文述有海運議。

拖水遣聞人。鳩流法王景。君長經傳者。乃復鴻驅騁。示我河渠書。豈云隻字警。陳大令鶴壽。

州縣每相謂。此官殊自粗。多言有真意。俸入此時須。庭晚梳髮罷。蕭蕭樹幾株。蔡大令王

馬曹自言忙。愛古遭人詆。當其勤著錄。劇若稽鹽米。衰衰詞林中。吾推有根柢。朱兵部爲蜀。雅好金石文字。

未老意錯莫。茫茫人海中。跨驢怕徒步。力盡耳雙聾。輸卻華山下。蒲團打睡翁。項孝廉杜。

欽案十餘年。心勦悲形瘵。一聞吐妙辨。勿藥成瘳快。今夕感分飛。悠悠各行邁。宮編修煥。今年奉使入蜀。

養冲營自寡。習嬾道因全。我愛周司業。初寒掩閤眠。從來患關隔。同病更相憐。周司業之琦。

學薺亦已勤。作事不厭繁。偶然入蕭寺。乞聽西方言。雪止僧未歸。茗香入晴軒。朱處士鶴年。

采柏詠佳人。揮觴矚時運。幽襟或暫契。清製乃獨奮。惟恨臣朝饑。聞寂誰相問。邵上舍廣銓。

垂老意有託。見之從軍篇。計乖夢亦左。寂處私自憐。沈埋舊篋筆。羞澀空囊錢。再從兄東。

西臺望雄切。出又領儲胥。一蹶不復起。聚徒方授書。炎方景殊異。餐衛問何如。從兄斌爲粵東書院山長。

廿載專門學。百篇題畫詩。俗人強曉事。舉手擲揄之。元晏今不作。終須失左思。舍弟杜。有松壺畫贊二卷。